

» De qua nasce, che sto popolo che trae la propria sussistenza  
 » dalla mercatura, dalla negoziazion, dalle arti, quando el se dona  
 » al lusso, quando el fa una vita dissipada, nol pol attendere alla  
 » mercatura, alla negoziazion, alle arti, e mancandoghè queste ghe  
 » manca la propria sussistenza. Da sto fonte ga origine i continui  
 » fallimenti, che indebolisce sempre più el commercio, che fa perder  
 » el credito alla nostra piazza.

» Se rimedio se deve applicar a sti disordini; cosa se doverà  
 » dir del ministero? Ogni macchina senza disciplina precipita.  
 » Questo ze un corpo, i membri del qual tratti da vili ceti no i ha  
 » avudo alcuna educazion: pieni de miseria e de fame, no i serve e  
 » i magna. Cosa gali de salario? Poco. Cosa fali? Niente. Come  
 » viveli? Da gran signori. No lo so. Providamente fu ordinà, che  
 » tutto el vostro stato dovess'esser cattasticado. Su sto comando,  
 » ogni ordine, ogni ceto de persone, ogn' arte fu tolta in nota, e da  
 » ste note ghe ne apparisce i individui. Dove avemio sto cattastico  
 » del ministero? L' anno 1763, l' eccellentissimo senato ha comandà  
 » al magistrato dei scansadori de riconoscer l' argomento. Qual fu  
 » el prodotto dei loro studj, delle loro cure? Nessun. Avemo el co-  
 » mando del senato, no gavemo el catastico. A che serve le leggi,  
 » se queste no ze eseguide? Dannosa l' inesecuzion se no ghe ze  
 » apposto rimedio. Fra tanti disordini nell' eccedenza dei prezzi nei  
 » generi de prima necessità, nella qualità del costume non proprio  
 » del vostro virtuoso governo, in sto terribile arcano del ministero,  
 » perchè no se ga da cercar qualche riparo? I vostri maggiori vi  
 » ha consegnà la Repubblica piantada su santissime provide leggi  
 » de politica civile, de economia. Su sti fondamenti avemo visto  
 » Venezia toccar l' apice della gloria. Ma in ancuo, se podesse sti  
 » maggiori reviver, no i conoscerave più Venezia in Venezia; i  
 » trovarave al più Venezia nascente, no Venezia piantada; e da sto  
 » tristo esame, qual rossor no covrirave el volto dei loro posterì?

» Ma no se farà gnente; la politica vol che se tasa. La politica  
 » vol che se fassa? Ma qual frutto sperele da sto quietismo? Se